

एफिसीरालाई पावलए परींद ओरायो चिथी

आव चिथी एफिसस सहरलाव मन्दलीलाई पावलए इयालखानानी परींद ओरायो ज़ (एफिसी ३:१)। इ़ादा पावल एफिससल सौरिम लिद नल परमेस्वरए ओपाँ ओरासथैज़्याव (ओसाचीर १९:१-४१)। आव चिथील मिँरालाई परमेस्वरए येसु ख्रीसनी ओलस ज़ ओरासखैव (एफिसी १:४), सोनो प्राइँए याइँताव ब ओज़ालाई ज़ जैद ओरायो सरैःसिउ लिज़्या (१:१०,२२)। ननी ज़ मिँर जो जातलावर तादी ब (२:१४-१५), ओज़ार ताद येसु ख्रीसए ओल्थोनिकाव यादैज़्याव असिकर धोल पोगोल ज़ रैःज्यार (१:६-८)। है जैद मिँरालाई कितावनी खुल्द ओरानैज़्याव, हितावनी ज़ दोव ताके (४:१,१५)।

¹डा पावल, परमेस्वरए ओखतैनाव येसु ख्रीसए ओसाचीए डाल्योनी जे एफिससलाव येसु ख्रीसए ओसतत लिज़्याव, परमेस्वरए छैँव उमीँरालाई आव चिथी परींद डयाचिज़्या।
² परमेस्वर गेबाबु सोनो गेप्रभु येसु ख्रीसनी जेल्योदा नियुँ गराँद जेयुँ होलाँ जैद ओयाचिरक।

येसु ख्रीसनिकाव असिकर

³गेप्रभु येसु ख्रीसए ओबाबु परमेस्वरए उमिन बनै ओघ्योःक। नोए गेलाई ओल ओज़ा येसु ख्रीसए ओक्याँत ज़ स्वर्गताव लिज़्याव अचम्बलाव असिकर गेपुरुसए उजुँनी ज़ जोरैद नैद्यासिउ।⁴ इ़ादा ओल ज़ गेलाई, 'डाइ़ाक याखत माल्यो छैँवर घतारक' लिद नाम नम ओमाजैद ज़ ओज़ा येसु ख्रीसए ओदोव येननी ज़ छाँतिद ओनैसिज़्याव।⁵ निताव छाँतिद ओनैसिज़्यावराए गेल्योदा उयुँ थू जैद येसु ख्रीसनी ओज़ार जैन्या ब थरैद ओनैसिज़्याव। नो ओल ओपैँज्याव मितावनी ज़।

⁶परमेस्वरए गेल्योदा उयुँ गराँद तोबोका तोबो उयुँलाव ओज़ाए

ओक्याँत निताव असिकर अइज्ज जोरैद ओयासिउए उमिन ब सघ्योःद गेएज्या। 7 नो ओजा येसु खीसए उजिउ झाःद उझी सोभोद ओयासिउए गे गेदोव पापए सजा भरी फोःघासिक्यो, परमेस्वरए ओकानुन गेबलेव ब क्याल्घासिक्यो। परमेस्वरए नाःल्दिउ येन दाद ओयासिउ ते घ्योःव ओदयानी ज़। 8 नो ओदया गेक्याँत थुघाद अचम्बलाव उबुद्धी ब धोल पोगोल ज़ याद नैसिउ।

9 नो ओजानी ज़ अचम्बलाव ओगोईनी ओल है उलिज्याव मितावनी ज़ डादाकिनकाव कप्सिउ सुए ज़ यामासैताव येनर दाव ओपैज्याव ब सतैघासिक्यो। 10 नो आज्याल सतैद ओयासिउ ओयेनर आवर ज़ — ओल गोइँद ओनैज्याव बेला ओयोवत ज़ ओराजैव भरी, नामलावर तादी ब, नमतावर तादी ब, ओजा येसु खीसए उधूँल याजैक्यो। 11 ओल ओबताहा दैन्या उमीर जैन्याए जूनी गेलाई खीसए ल्योनी डादाकिन ज़ छाँतिद ओनैसिज्याव। परमेस्वरए ओयेन भरी डादा ओल उयुँल थरैद ओदोज्यावए गे हुनी ज़ ताद गेले। 12 परमेस्वरए फरी गे डादाकिन ज़ खीसलाई गेयुँ हुपूद ओक्याँत ख्यासिद लिज्यावरलाई उमिन सघ्योःघन्याए जूनी खतैद नैसिउ। 13 जे ब खीसनिकाव अजम्बरी जुनी यान्या साचो ओथा थैद जेयुँर सुहुपूद ओपाँत जेहुके। ननी ज़ जे परमेस्वरए ओयाकालाव छैव पुरूस दैद ओजाए उमिनत थामिद नैसिउर जेताके। 14 नो ओयासिउ पुरूस गे उमीरालाई चबनै फुर्सुल जैद ओराएरिज्याव बताहा ओमायासिवा पै, ‘डाजारालाई अजम्बरी जुनी यान्या डाले’ लिद बैना याद नैसिउ। ननी ब ‘डामिन सघ्योःद घयारक’ लिद परमेस्वरए निताव येन दोघासिक्यो।

पावलए असिक निद ओरायो

15 जे, गेप्रभु येसु खीसलाई जेयुँ हुपूद परमेस्वरए छैव उमीराए ल्योदा जेयुँ थू जैद नोरास खैद जेलिज्या दी लिन्या डाथैक, 16 जेजूनी परमेस्वरलाई डापोखारिउ पती धन्याबाद चरैःव ज़ डानैज्या।

17 गेप्रभु येसु ख्रीसलाई परींज्याव जगै मगैव परमेस्वर गेबाबुए ओललाई सरैस्धुन्या ओसक्तीर, ओल उबुद्धीर ब ओयाचिउक लिद डापोंखारिऱ्या। 18 सोनो परमेस्वरए उखुल्चिज्याव अजम्बरी जुनी आः चाव उलिज्याव ओल्यो लिन्या जेयुंल ज थरैधुन्यार ओतारक लिद ब डापोंखारिऱ्या। गे छैव उमीरालाई बनै अचम्बलाव युं होलाँ दाव पाँर थरैधुन्यार ब ओजैचिउक। 19 झन गे ओललाई गेयुं हुपूज्यावराए जूनी दाद ओयासिज्याव ओसक्तीलाव येनर आः चावर ची यालिज्याव ओल्यो लिन्या थरैधुन्यार ब ओजैचिउक। 20 नो गेजूनी दाद ओयासिज्याव ओसक्ती, ख्रीसलाई सिउनी ओसोचोइव ओसक्ती ज़। हो ओसक्तीए ज़ फरी ख्रीसलाई स्वर्गताव ओमान ल्यो पोल नैक्यो। 21 ख्रीस नो पोल आव जुकल तादी ब, हुन्या जुकल तादी ब, नाम नमलाव लिज्याव भरिराए याडैताव ज़ ताके। है जैद घेप्पा मिन दैवर तादी ब, राजार तादी ब, दै देवतार तादी ब, स्वर्गताव चाकर्यार तादी ब, 22 परमेस्वरए प्राईं जात ज़ ओज़ाए उखँ धूँल झाःद ब एक्यो, मन्दलीए जूनी ओज़ालाई प्राईं डैताव ब जैक्यो। 23 मन्दली ख्रीसए ओक्याँ ज़। है जैद नाम नमलाव प्राईं सयोऱ्याव ख्रीस नो मन्दलीनी योव ज़ ताऱ्या।

2

परमेस्वरए ओदयानी अजम्बरी जुनी गेदैके

1 जे ड़ादा परमेस्वरकिन तँदा ताद मादान्या येनर दाद सिउल गनिसिउर जेल्यो। 2 हो बेलाक आव मानुवाताव मिँर याबाज्यावदा ज़ जे मनी जेबाज्याव। माचाव पुरूसराए याघेप्पाए उधूँल ब जेलिज्याव। नोए परमेस्वरकिन तँदा लिज्याव भरिरालाई चलैव ज़ यानैज्याव। 3 गे ब ड़ादा नोरास लिद जोत ब गेयुं मानैधुद गेमन लागिउ येनर गेदोज्याव। है जैद गे ब नो उपुर्कावराए माँःती परमेस्वरए उरिस चोवर गेल्यो। 4 हितावत ब परमेस्वरए उयुं बनै

ओगराँवए गे निताव मिँरालाई ब उयुँ नाद गेलाई मया दासिक्यो।
 5 ओल उयुँ ओगराँवनी ज़ गेलाई निताव पाप दाद सिउल गनिसिउनी
 हाइद ओज़ा येसु ख्रीसस अजम्बरी जुनील बान्या जैसिक्यो।
 6 परमेस्वरए गेलाई येसु ख्रीसस सिउनी सोचोइद स्वर्गत सिप ज़
 राज्या चलैन्या जैद नैसिउ। 7 आव भरी ते आव जुक ओखेमोत
 खर्क ज़ माखेमन्या ओराज्याल ओल उयुँ गराँद ओज़ा येसु ख्रीसए
 ओक्याँत गेल्योदा ओदोव मागनिसिधुन्या ओदया सरैःन्याए जूनी
 ज़। 8 परमेस्वरए ल्योदा जेयुँ जेसुहुबोए उयुँ गराँद बाँचैद नैचिउ।
 नो जे जेदोवनी माःक, परमेस्वरए अइज़ ओयाचिउ बरदान ची। 9 गे
 गेदोवनी ताकिन ते सघ्योःसिन्या गेल्यो। 10 गे ओल उसिजैसिउर
 ज़। नो उसिजैसिउ फरी ओज़ा येसु ख्रीसनी ज़। गेलाई उयुँलाव
 मिताव येन दान्याए जूनी डादा ज़ थरैद ओनैसिजूयाव।

येसु ख्रीसनी यहूदी मायहूदी तोबो ज़

11जे छुत जातलाव मिँर डादा अछतड जेल्यो लिन्या तामेःच्यो।
 जेलाई यहूदीराए भाःकिन ज़ 'क्यालन्या सरैस माजैसिउर' लिद
 यासज़िमचिजूयाव। खाली नो सरैस ते पाखाताव यहूदी चलन वाज़
 लिजूया। 12 हो बेलाक साचो नोराए है यादाचिजूयाव मिताव ब
 जेल्यो। जे डादा ख्रीसकिन अछतड, इस्राएलीरास ब मागनिसिउर,
 परमेस्वरए ओय़ाकालाव असिकल ब माल्योर, आव मानुवात बिनु
 परमेस्वरलावर काताए आस ब माल्योर जेल्यो। 13 आज्याल ते
 जे येसु ख्रीसस सिप ज़ ताद जेले। जे डादा परमेस्वरकिन तादाड
 ल्योरालाई येसु ख्रीसए उजिउ झाःद्याद उझी सोभोद ओयाचिउए
 जेलाई परमेस्वरए ल्योदा रैद नैचिउ।

14ख्रीसए गे यहूदी मायहूदीरालाई मासखैद नेभा जैजूयाव गेखार्लाव
 पाँलाई खेमद्याद सखैद तोबोल ज़ थोम्सिक्यो। 15 नो नेब्लोलाई
 थोम्द गेलाई ओल उमिनताव साःरो तक्याँ ज़ जैन्याए जूनी

उजिउ झाःद गेलाई मासखैजूयावलाई उमिन समैदिक्यो। नो गेलाई मासखैजूयाव पाँ पाखाताव मोसाए ओकानुनलाव सर्सिउ यहूदी चलनर ज़। 16 ख्रीस क्रुसत तङ्गैसिद ओल उजिउ झाःद ओयासिउनी मिँ भरिरालाई या याल मासखैजूयावलाई खेमघाद तोबो ज़ जैद परमेस्वरस यासखैजूयाव। 17 ओल आव मानुवात हुद गे परमेस्वरस नजिक ल्यो यहूदीर सोनो जे परमेस्वरकिन तादाड ल्यो छुत जातरालाई या याल सखैन्या पाँर यासथैक्यो। 18 ख्रीसए ल्योनी गे नेथोए तोबो छैव पुरुस ज़ दैद परमेस्वर गेबाबुए ल्योल पसिउ गेदैजूया।

19 है जैद जे आज्याल ते परमेस्वरकिन तादाडावल गनिसिउर जेमाले। परमेस्वरए छैव उमीरास तोबोल ब गनिसिद जेले, परमेस्वरए उझिमलावर ब ताद जेले। 20 जे अगमबक्तर सोनो ओसाचीराए याथालिउ गज तर्त झाःसिउ मितावर ताद जेले। येसु ख्रीस फरी झिम अदैजूयाव गजलाव लुँ स्यासो लिजूया। 21 झिम भरी होए ओतर्त अदिद जे लुँए तर्त लुँ जोरैसिउ मितावर ताद प्रभुए छैव उझिम जेतानाजूया। 22 ओलस तोबो ताद जे मनी छैव पुरुसनी परमेस्वर लिन्या झिम जेतानाजूया।

3

छुत जातलावरासकाव पावलए ओयेन

1 है जैद जे छुत जातलाव मिँरालाई येसु ख्रीसए ओपाँ डसथैचिउनी झ्यालखानाल परिद लिजूयाव डा पावलए जे जेजूनी पोखारिउ ज़ डालिजूया। 2 जेलाई परमेस्वरए याव ओपैजूयाव असिकर सथैन्या डाकुइत याद ओनैनाजूयाव जेसैजूयाखेहो। 3 आकिन यादा जाँ जाँ सर्द डयाचिउ मिताव परमेस्वरए डादाकिनकाव कप्सिउ पाँर सतैद नैद ओयाँजूयाव। 4 नो पाँर चावस जेचिऊकिन 'परमेस्वरए ख्रीसए ओक्याँताव ओदोव येनर पावलए ओसैजूयाव

ची ओल्यो' लिन्या थरैन्या जेले। ⁵ नो पाँ भरी गेकिन डादाडाव मिँरालाई आज्यालकाव मिताव चावस सतैसिउ ओमालिज्याव। आज्याल ते छैँव पुरूसनी नो पाँर येसु ख्रीसए छैँव ओसाचीर सोनो अगमबत्काराए जूँनी ओपोःस ज़ सरैःसिउ लिज्या। ⁶ नो कप्सिउ पाँ आव ज़ – परमेस्वरए यहूदीरालाई वाज़ ओरायो याकालाव असिक आज्याल ते जे छुत जातलाव मिँराए ब आव गेसथैचिज्याव चाव थानी येसु ख्रीसए ओक्याँतिन यहूदीरास सिप ज़ दैन्या जेताके। जे नोरास तोबोए ओथोर ताद सिप ज़ परमेस्वरए ओराज्यालाव बताहा दैन्यार ब जेताके।

⁷ डा फरी परमेस्वरए उयुँ डाल्योदा गरॉद डाक्याँताव ओदोव ओसक्तीनी नो पाँ सथैन्यात ओसेवा दान्या ब डाताके। ⁸ परमेस्वरए उमीं भरिरानी डा प्राइँरानी जिम्ज़ा कान्ल ज़ मागनिसिउ डाल्यो। हैदी ब परमेस्वरए नाःल्दिउ असिक याद छुत जातलाव मिँरालाई ख्रीसए ओक्याँताव अचम्बलाव ओपाँर भाःन्या जैनाक्यो। ⁹ हो वाज़ माःक, प्राइँ जैज्याव परमेस्वरए डादाकिन ज़ आज्याल पै कपूद ओनैज्याव पाँर इतावनी ज़ दोज्याव लिद प्राइँ मिँरालाई सतैद्याव ब डादैके। ¹⁰ गे ओमन्दलीए गेक्याँताव ओदोव येननी स्वर्गताव घेपपार सोनो यासक्ती ल्योराए परमेस्वरए अचम्बलाव उबुद्धीर घरँःरक लिद, ¹¹ परमेस्वरए डादा ज़ थरैद ओनैज्याव मिताव गेप्रभु येसु ख्रीसनी आव येन दोक्यो। ¹² अबकिन गे येसु ख्रीसस तोबो ताद ओललाई गेयुँ उहुबोनी ज़ परमेस्वरए ओल्योदा गेबाक गेलाई सुमसिवा ज़ लिद गेयुँ हुबो ज़ लिज्या। ¹³ है जैद जेस डाबिन्ती लिज्या, डा जेजूनी दैद डानैज्याव आव दुखर रँःद जेयुँ तासतेच्यो। आव भरी जेलाई तान्याए जूँनी ज़ लिज्या।

एफिसीराए जूँनी पावलए ओपोःखारिउ

14 है जैद डा परमेस्वर गेबाबुए ओड़ाक डाघूँदानी फुलुप्सिद डापोंखारिज़्या। 15 नो गेबाबुए ल्योनी नाम नमलाव ओथोराए यामिन नैसिउ लिज़्या। 16 जेजूनी डापोंखारिक, परमेस्वरए अचम्बलाव ओअसिकनी जेलाई छैव पुरुस याद जेयुँल थोरिउर ओजैचिउक है डालिज़्या। 17 परमेस्वरलाई जेयुँ जेसुहुबोनी फरी खीसए जेयुँल बास ब ओदोवक। ननी ज़ नै मेरास सोनो परमेस्वरए ल्योदा मया जेदोकिन रामिउ जरा सोनो गज मिताव थोरिउ तान्या जेले। 18 है जैद खीसए ओमया गेल्योदा खा ख्योःव, खा राँव, खा झेंःव, खा उर्जी ल्यो उलिज़्याव, हो छैव उमीरास सिप ज़ घसैरक लिद ब डापोंखारिज़्या। 19 नो सुए ज़ यामासैंधुज़्याव ओमया सैद वाज़ परमेस्वरए ओगे किताव उलिज़्याव हिताव ज़ जे जेगे ब तान्या ले।

20 परमेस्वरए गेयुँलाव ओचलैज़्याव ओसक्तीनी ओलस गेनिज़्यावकिन सोनो गे है गेलिज़्यावकिन, इन ज़ कुधु दाद्यासिज़्याव। 21 निताव दाद्याज़्यावलाई मन्दली सोनो येसु खीसए ओक्याँत पिरी पिरी पै खर्क ज़ माखेम्न्या ज़गै मगैव ज़ ओताक। आमेन।

4

परमेस्वरए उमिनतावर तोबो क्य़ाँ ज़

1 है जैद डा गेप्रभुए ओयेनए जूनी झ्यालखानाल लिज़्याव कैदीए डाल्योनी जेलाई है डादाचिज़्या, जेलाई परमेस्वरए कितावनी खुल्द ओनैचिज़्याव, हितावनी ज़ दाव ताके। 2 मास०द, तहस लिद, चाव माचाव गाल्द जे जेल युँ नैद सहिसिद ल्यो ताके। 3 सोनो जे जेल खैद परमेस्वरए उपुरुसनिकाव ताज़्याव तयुँ जैद लिन्यादा कलँ ब ल्यो ताके। 4 गे भरी तोबो क्य़ाँ ज़ ताद, तोबो पुरुस दैद, प्राइँ तोबो आसदा ज़ खुलसिउ गेलिज़्या। 5 प्राइँए गेप्रभु ब तोबो ज़, गेभेंःव पाँ ब तोबो ज़, गेसछैँसिउ ब तोबोनी ज़। 6 प्राइँए गेबाबु परमेस्वर ब तोबो ज़ लिज़्या। नो प्राइँए गेडैत, प्राइँए गेखार्ल, प्राइँए

गेयुँल ब लिज्या।

ख्रीसए ओगोईनी सु सु गेबरदान लिज्या

7हैदी ब ख्रीसए गे उमीरालाई ओल ओगोईव मितावनी ज़ ओयेन दान्यात सु सु गेबरदान याद नैसिउ। 8 धर्मसास्त्रल ब अइ लिद ससिउ लिज्या,

“रोत उपुलुसोत

ओराहारैव उसुतुर भरी कैत जैद,

ओल उमीरालाई असिकर भाःद याएक्यो।”

9रोत पुलुसोए ओअर्थ आव ज़ — डादा नामल झरिद नाम जील मनी पसिउ ज़। 10 नो नामल झरिउ ते स्वर्गताव प्राईरानी झेंःवत पुलुसुद नाम नमलावराए याडैताव ख्रीस ज़। 11 ख्रीसए भाःद ओरायो असिकर आवर ज़ — ओलस ओलस बारिउरालाई ओसाचीर याजैक्यो। ख्वारालाई फरी अगमबत्कार, ख्वारालाई ओपाँ फीजैन्या, ख्वारालाई मन्दलीलाव लोम्बा येन दान्या सोनो परमेस्वरए ओपाँ सिऊन्या याजैक्यो। 12 आव बरदानर गे परमेस्वरए उमीरालाई ओयेन दान्यात पाखो जैद मन्दलीलाई* पाथ पारैन्याए जूनी यासिउ लिज्या। 13 हो ताकिन ची गे युँ हुपन्यात सोनो परमेस्वरए ओजा येसु ख्रीसलाई संरेसन्यात खैवर तान्या गेले, सोनो पाखो ताद ओल ख्रीस किताव ओल्यो, गे ब हिताव ज़ तान्या गेले।

14गे माछिपताव लुजा बाँजा स्यासोर लिन्या माःक। निताव मिँए आदा होदाडाव पाँर थैद कैताक अनाकलाव सिजैसिउ पाँरादा बाद बलेज्यावराए ल्योनी झुकिद नो मिँ बतासए आदानी होदा ओख्याज्याव पुल स्यासो ज़ ताज्या। 15 बुरू गे नै मेंरास खैद साचो पाँर दाद प्राईल ज़ गेप्रभु येसु ख्रीसए ओदोव मिताव गे ब दोनाव ताके। ओल ज़ गेडैताव लिज्या। 16 गे ओक्याँर फरी ओक्याँत

4:8 4:8 भज ६८:१८ * 4:12 4:12 ग्रीक खामनी — ख्रीसए ओक्याँलाई। एफि १:२३ चिऊन्या।

जोरैसिद सु सु गेयेन याद ओनैसिज्याव मितावनी ज़ दाद प्राईं खैद ख्रीसए उमिनत लिज्याव गेक्याँ छिपूद पाखो गेताज्या।

सा:रो युँ रैव ताके

17 है जैद डा गेप्रभुए उमिननी है डादाचिज्याव पाँ चावस थैच्यो, जे परमेस्वरए ओपाँ मासैज्यावराए माँ:ती अनाकलाव पाँरादा येनरादा फरी ताबाच्यो। 18 नो अनाकलाव येन दाज्यावर ते यारुँनी काता ज़ माहुवर परमेस्वरकिन तँदाडावर ताद परमेस्वरए ओल्योनिकाव जिउँनील मागनिसिउर ज़ ताज्यार। है जैद काता ज़ मासैन्यार, यारुँ बनै खावर, 19 यालाज माल्योर यातावए, नोर युँ माजामो येन दान्यादा याजिउ च्यो च्यो झा:द प्राईंत ज़ लोभ दोज्यार, प्राईंत ज़ फुरी येन ब दोज्यार। 20 जे ते ख्रीसए ओयेन नितावनी जेपैसिउ मा:क। 21 परमेस्वरए ओपाँ जेथैक, येसु ख्रीसनिकाव साचो पाँ इताव ची ओल्यो लिन्या जेसैखेहो। 22 डादाडाव जेयुँए मादान्या वाज़ खिम्द ओबलेचिज्याव। आकिन ते नो मादान्या जेदोज्याव येनर रास्द, 23 सा:रो युँ रैव ताके। 24 नो सा:रो युँ ते छैव सतलाव येन दान्यात ओल परमेस्वरए ओगेनी ज़ जैसिउ लिज्या।

दान्या मादान्या येनर

25 है जैद धुत पाँ भरी रास्द छुतरास साचो पाँ वाज़ पाँव ताके, काराव ल्यो ताकिन गे प्राईं तक्याँ ज़। 26 कातारात जेरिस ओचोकिन मादान्या येन तादोच्यो। नो जेरिस हो छचाम ज़ उसिक। 27 जो येनल तादी ब सैतानलाई येम ताएच्यो। 28 कुज्याव मिँ फरी ताकुक। बुरू उकुइए साचो येन दाद माथैव मायो:वलाई ओयोक। 29 कोभा पाँर जेया:नी ताहुक। बुरू थैज्यावरालाई तान्या चाव पाँ वाज़ पाँव ताके। 30 परमेस्वरए छैव उपुरूसए उयुँ सघर्द ताएच्यो। नो पुरूसनी ज़ परमेस्वरए गेलाई फाल्न्या छचाम घबाँचिरक लिद

थामिद नैसिउ। ³¹ जे जेल मासखैजूयाव युँ, रिस चोन्या, युँल नैन्या, थलन्या, अर्काए उमिन बलेन्या, सोनो युँनी कुबातें हुजूयाव भरी प्याःपी जैद ख्याव ताके। ³² बुरू किताव परमेस्वरए येसु ख्रीसए ओक्याँत मादान्या जेदोव रास्द ओयाचिउ, जे ब छुतलाई जेयुँ नाद जेउपर्त मादान्या ओदोव रासो ताके।

5

¹ है जैद जे परमेस्वरए उयुँलाव ओज़ार जेतावए ओल ओदोज़्याव येन स्यासो ज़ जे ब दाव ताके। ² किताव ख्रीसए गेलाई उयुँ नाद परमेस्वरस सखैन्याए जूनी उजिउ झाःद ओयासिउ, हिताव ज़ जे ब छुतए ल्योदा जेयुँ नाद दाव ताके। ख्रीसए गेजूनी निताव येन ओदोव परमेस्वरलाई चाव सी डरो धुप ओचरैःव मिताव ज़ लिज़्या।

मादान्या येन दाज़्यावरास खदेप मालिन्या

³ खाली पातर्या पातर्नी जैसिन्या, प्राइँत लोभ दान्या, निताव फुरी येनर जेल्योड उमिन ज़ तारैःक। निताव येनर परमेस्वरए छेंव उमीरालाई मासहिउ। ⁴ उर्ती माल्यो माचाव ल०न्या पाँर ब ताताक, आव ब माचाहिउ ज़। बुरू परमेस्वरए उगुनर मामेःद धन्याबाद याव ज़ नैच्यो। ⁵ जे ब जेसैजूया, युँ माजामो येन दाज़्यावर, लोभ वाज़ दोज़्यावर परमेस्वर सोनो ख्रीसनी निराज़्याल काता ज़ दैन्या मालेर। लोभ दान्या ते अडग्या पुजा दाज़्याव स्यासो ज़। ⁶ जेलाई निताव अनाकलाव पाँरानी सुवाराए ताडुकैचिरक। परमेस्वरए आव पाँरानी ज़ ओलकिन तँदाडाव लिज़्यावरलाई उरिस चोज़्या। ⁷ है जैद जे निताव पाँ दाज़्यावरास खदेप ब तालिच्यो।

पलाँवलाव येन दान्यार

⁸ जे ब डादा चुम चुमोलाव येन दाज़्यावर जेल्यो। अब ते प्रभुए ओपलाँलाव येन दान्यार जेतावए हो मिताव ज़ दोनाच्यो। ⁹ पलाँवलाव येनर आवर ज़ — साचो सतलाव चाव येनर दाद,

10 'प्रभुए उयुँ कातानी होलाँ जैद डाएके' लिन्या लिज्ज्या। 11 जे चुम चुमोलाव अनाकलाव येनरानी अछतड लिद, 'नो येन ते चाव मा:क' लिद सतैद्याव ताके। 12 नो चुम चुमोलाव मोसिद दाज्यावराए यायेन या:नी हाइन्या ब लाज हुव लिज्ज्या। 13 खाली मोसिद यादोदी ब पलाँवए सतैद याएज्याव। पलाँवए मारै:वर ब यासरै:ज्याव। 14 है जैद अइ ब लिज्ज्यार,

“अ सिउ स्यासो इल्द लिज्ज्याव मिँ,
सैसिद सोनिकेदा,
ख्रीसए ओज्जगै नक्याँत ज्जगै तारिज्ज्या।”

15 है जैद आव जेजिउत जोगोइसिद दाव ताके। मासैन्याराए यादोज्याव मिताव मा:क, सैसिद दाव ताके। 16 आव गेसमय बनै माचाव ओतावए परमेस्वरए ओयेन दान्यात मौका भरी छुपिउ ताके। 17 है जैद सैसिद मालिज्याव मितावर ताताच्यो। बुरू परमेस्वरए उयुँलाव येनर सैधुन्यार ताच्यो। 18 मद छोकोराए तासमँ:सिच्यो। नोए मुख्व येन वाज्ज पले:ज्याव। बुरू छैव पुरूसए सब्याल्सिद, 19 जे जेल खैद प्रभुए उमिनत भजनर गैद, जेयुँल उमिन सघ्यो:द्यान्या गितर गैद रेंच्यो। 20 गेबाबु परमेस्वरलाई प्रभु येसु ख्रीसए उमिननी प्राइँल ज्ज धन्याबाद चरै:व ज्ज नैच्यो।

ज्या-रीलाव पाँर

21 किताव जे ख्रीसए उधुँल लिद ओमान नैद जेएज्याव, हिताव ज्ज जे जेल ब जेमान नैसिच्यो। 22 जे रे दाव मेंमार मनी जेरेराए यामान नैद्याद यापाँ धुँल लिच्यो। नो मनी 'प्रभुए उजुँनी ज्ज डादोज्या' लिद सज्जिउ ताके। 23 ख्रीस गे उमिनतावरालाई बाँचैज्याव ज्ज। किताव गे मन्दलीए गेडैताव ख्रीस लिज्ज्या, हिताव ज्ज जे जेडैत जेरेर लिज्ज्यार। 24 है जैद किताव मन्दली ख्रीसए उधुँल उलिज्याव, हिताव ज्ज जे रे दाव मेंमार ब प्राइँत ज्ज जेरेराए यापाँ धुँल ल्यो ताके।

25 सोनो जे ज्या दाव खेपार किताव ख्रीसए ओमन्दलीलाई उयुँ

नाद उजिउ झाःद ओयासिउ, हिताव ज़ जे ब जेज्यारालाई जेयुँ ओनाक। ²⁶ गेजूनी खीसए उजिउ झाःद्याद ओपाँनी सोनो रील सछैद गे ओमन्दलीलाई छैव जैसिक्यो। ²⁷ किताव ज्या दाज्याव खेपाए ज्या औरैक ओज्यालाई चाव चाव क्वार क्वाइद पाताला पुतुलु ओजैज्याव, हिताव ज़ गेलाई ब खीसए उचिहुसिरिज्याव छयामए उजूनी छैव, खत माल्यो सोनो ज़गै ज़गैव ओमन्दली जैसिज्याव। ²⁸ जे ज्या दाव खेपाराए जेक्याँलाई किताव जेसमारिज्याव, हिताव ज़ जेज्यारालाई ब समारिउ ताके। जोए ओज्यालाई समारिज्याव, होए ओक्याँलाई ओसमारिज्याव मिताव ज़ लिज्या। ²⁹ क्यौँए क्यौँलाई सुए ज़ मासोव, बुरू किताव खीसए गे ओमन्दलीलाई ओसमारिसिज्याव, हिताव ज़ मिँए ओक्याँलाई समारिद पाथस नैज्याव। ³⁰ नो खीसए ओसमारिसिज्याव ते गे ओक्यौँर गेतावनी ज़। ³¹ धर्मसासत्रल ब इताव सर्सिउ लिज्या, “खेपाए ओबाबु ओआमालाई रासूद ओज्यास सिप ताद, नोनी तक्यौँ ज़ ताज्यानी।”

³² आव पाँए ओअर्थ बनै घेप्पा लिज्या। डा फरी नो पाँए ओअर्थ आव डसरोल जाँकोसै खीस सोनो मन्दलीराए ल्योदा वाज़ झाःद डानै। ³³ हैदी ब जे ज्या दाव खेपाराए मनी, जेक्याँलाई किताव जेसमारिज्याव, हिताव ज़ जेज्यारालाई समारिउ ताके। जे रे दाव मेंमार ब जेरेराए यामान नैद्याव ताके।

6

ज़ा बाबुराए यायेन

¹ जे लुज़ा बाँज़ार, प्रभुए उमीर जेतावए जेबाबु जेआमाराए यापाँल लिच्यो। निताव दान्या जेलाई ओचाहित ल्यो लिज्या। ² धर्मसासत्रलाव दस पाँल इताव सर्सिउ लिज्या, “बाबु आमाए ओमान नैद्याव ज़ परिए।”

नो पाँत तोबो घ्योःव असिक ब जोरैसिउ लिज्या। 3 नो असिक आव ज़,

“निताव जेदोकिन चाव जिउँनी रैद कुधु बाँचिन्या जेले।”

4जे याबाबुराए फरी जेज़ारालाई गनका गन दाद यायुँ केःद ताराएच्यो। बुरू परमेस्वरए ओपाँ सिऊद मलैव ताके।

बाँदार सोनो साहुराए यायेन

5जे बाँदा लिज्यावर, आव मानुवाताव जेसाहुराए यापाँ भैःद, ‘ख्रीसए उजूनी ज़ डादोज्या’ लिद छेःद यामान नैद्याद साचो युँस दोच्यो।

6नो जेयेन मिँरालाई खुसी जैन्याए जूनी वाज़ माःक, बुरू ‘डा ख्रीसए ओनोकोर ज़’ लिद परमेस्वरए है उलिज्याव मितावनी जाँगरस दाव ताके। 7 मिँराए यासेवा जेदोक, ‘आव डादोज्याव मिँराए जूनी माःक, प्रभुए उजूनी डादोज्या’ लिद रेंद ज़ दाव ताके। 8 चाव येन दान्यात, बाँदा जेलिदी ब, माबाँदा जेलिदी ब, ‘किताव येन गेदोज्या, हिताव ज़ प्रभुए ल्योनी गेदौरिज्या’ लिद सम्जिउ ताके।

9जे साहुराए ब हितावनी ज़ सम्जिउ ताके। जेबाँदाराए डैत जेरिस चोद अखत्यासो जैसिन्या माःक। जेबाँदारास प्राइँ जेर्गे स्वर्गत लिज्या। नोए मिँ रेंःद मादोव, येन रेंःद दोज्याव।

सैतानस लरें दान्या हत्यार

10जेस प्राइँरानी छीनीकाव डापाँ आव ज़ — प्रभुए ल्योनिकाव जेदैव ओसक्तीनी थंरिद ल्यो ताके। 11 सैतानए जेलाई झुकैव ओपैँज्याव उबुद्धीलाई वैद्याद ओझाक थाँसिन्याए जूनी परमेस्वरए ओयासिज्याव हत्यारर भिरिसिउ ताके। 12 गे दान्या लरें मिँरास माःक, चुम चुमोलावराए याघेपपार, यासक्ती ल्योर, दै देवता झ्या मोर, सोनो नमताव माचाव पुरूसरास लिज्या। 13 है जैद माचाव बेला उहुक नितावराए ल्योनी जोगोइसिन्याए जूनी परमेस्वरए ओहत्यारर भिरिसिद नोरालाई थन थन अदैद छीँड पै थंरिद ल्यो

ताके। 14 किताव लरेंदा बाज्याव मिँए वाँ:फोर पो:सिद झा:सिद बाज्या, हिताव ज़ जे ब परमेस्वरए साचो ओपाँर रैद झा:सिद ल्यो ताके। नो मिँए फरी ओछातीलाई जोगोइन्याए जूँनी झँए पाता जासिज्या। हिताव ज़ जे ब परमेस्वरए ओपाँत माधलिन्याए जूँनी परमेस्वरए ओपाँर सतस दाव ताके। 15 किताव नो मिँ उखँत पोला जासिद बाज्या, हिताव ज़ जे ब युँ होलाँ दाव परमेस्वरए चाव ओथा प्राइँदा सथैन्याए जूँनी झा:सिद बाव ताके। 16 फरी किताव लरें दाज्याव मिँए ओधालए ला मुइलाई सोतोइज्याव, हिताव ज़ जे ब परमेस्वरलाई जेयुँ उहुपूकिन सैतानए ल्योनिकाव हुज्याव पाँर सोतोइधुन्या जेले। 17 फरी किताव नो मिँए ओडै जोगोइन्याए जूँनी झँए तुपी जासिद बाज्या, हिताव ज़ जे ब ‘परमेस्वरए जोगोइद अजम्बरी जुनील ज़ सकेसनावा’ लिद जेयुँ सुहुपूद ल्यो ताके। फरी किताव नो मिँ तरवालीस बाज्या, हिताव ज़ जे ब छैँव पुरूसए ओयासिज्याव तरवाली रैव ताके। नो तरवाली परमेस्वरए ओपाँ ज़।

18 एकमन्या ज़ परमेस्वरए उपुरूसनी पोंखारिच्यो। प्राइँनी सैसिद जेर्च्या मासै:द परमेस्वरए छैँव उमींराए जूँनी पोंखारिउ ज़ नैव ताके। 19 सोनो डाजूँनी ब, ‘परमेस्वरए चाव ओथाए ओसै माछे:द ज़ सथैव ओदैवक’ लिद पोंखारिद्याव ताके। 20 नो चाव ओथा सथैन्याए जूँनी ओसाची डातावए इयालखानाल डापरिके। है जैद कितावनी पाँव परिन्या, हितावनी ज़ आल ब घ्यो:व युँस डापाँधुक लिद पोंखारिद्याव ताके।

तुपैन्या पाँर

21 डा आल कितावस डालिज्याव, नो भरी प्रभुए ओयेन सतस दाज्याव गेयुँलाव गेभाइ तुखिकसए ल्योनी थैन्या जेले। 22 होए उजूँनी ज़ नो मिँलाई जेल्योदा डापरींज्या। आडाव गेपाँ भरी नोए

ओल्योनी थैद जेयुँर होलाँ तान्या ले ।

²³जे परमेस्वरए ओपाँत बाज़याव भरिरालाई परमेस्वर गेबाबु सोनो गेप्रभु येसु ख्रीसनी निल्योनी जेयुँ होलाँ जैद ओयाचिरक, जेयुँ हुपद जे जेल खैवर ब ओजैचिरक । ²⁴गेप्रभु येसु ख्रीसए ल्योदा साचोस यार्युँ थू जैद नैज़यावराए ल्योदा ब परमेस्वरए उयुँ ओगराँक ।

साःरो बाचा

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd